

TEMA 2

DUNIAK CERITE

1. Yama alam kerileng penteng ha hik?
2. Ma peranan hik ha pelestari alam?





UNIT 10

JUK HIBECERITE



Cerngai ru Belwal

Info

cerwad = cengkam
bidik = cemburu



EKTIVITI

1. Cerngai cerite abik.
2. Cerite nunoh nej ma de engkek cerngai.
3. Beh nelakon jjiio watak ku cerite.




Asal Kurak Icekop Berakkah





Ma iengrok de perahag ajuh, Kurak?

Eng ngcerap beleg atok eng.



Adoi!



Bei Bebacak



1. Bacak nepetek secare jelas ru sembot de betol.
2. Perendeg ayat ru pola ayat de betol.

Ayat	Pola ayat
a. Mergas ajeh tajap icengros.	FN + FK
b. Ilei pen kijar nu kenjeh.	FN + FS
c. Peringak ajeh naicekcet bak.	FN + FA
d. Lei hunen lod ajeh Lod Koh Teg bikermuh.	FN + FK
e. Batagari ajeh ku bareh ajereh.	FN + FN
f. Mengot ajeh guwer walah begecek.	FN + FA

Lod Koh Teg


Mong nukelamin, amek igensir ru nar urag ikenon de lekat sayet naigei kemil lod ku lengrik Groh. Peringak ajeh naicekcet bak. Lienai jugak naiek caknak ku was jeres.

Ku nanekjis, kelamin ajeh baiha cak tabeg. Igensir kipakat ikenah seksug ku batagari. Batagari ajeh ku bareh ajereh. Peksendok baicip, igensir kibesat nu iamek dek kijagak ikenon abor.

Kerundel kelamin ajeh baiet, ajak baisayet kitaj ceruk ku padek deg. Icenok baimenman ku pincong de senangur. Mengot ajeh guwer walah begecek. Imulak, iajak tok kiirau ha liubai mende baimenman serakngék. Tibak-tibak ilei kigerteg baisayet ajeh lekkek baileklug. Iajak kiget renyah mende ku serag jeoi menatag ces. Maken kipeder, gu besengral leknug baisayet. Ilei pen kisug ya os damar kaha neng ma baiui.

Iajak kikekjet kineng baisayet ajeh baibertot ru teg mergas. Mergas ajeh kilop iteg ku lubog dinig kaha gawaj ha baisayet. Mergas ajeh tajap icengros. Ubai tok baipanei mergas kaha berkep ha liubai. Iajak kinyong yoj ru kior baisayet ajeh bertot ru teg mergas. Bile imergas kilop iteg nunoh nej, iajak teros kitet teg mergas lei tunghud. Mergas kibekarau mende nyik. Ilei pen kjar ju kenjeh.

Tok leu, kelamin ajeh bajjug ju seknug. Ku padek nong, ubai baiburuk nuikor mergas ya dat. Teg mergas ajeh tunghud del bitet. Bile ubai bailei nu badeg, amek igensir kicerite ma de belakuk. Lei hunen lod ajeh Lod Koh Teg bikermuh.

**NOTA GURU**

Ulag kaji pola ayat FN + FN, FN + FA, FN + FK, FN + FS.












Bei Betules



1. Susut ayat jijoi nehator de betol.
2. Tules ayat kateh mentok perenggan gunakan tenules berangkei.

Batuk Tentop

-  Kenah gensir adeh rajit baibeselai.
-  Ku kerop jehuk, ikenah kitop kui igensir ru baibesimbang hal jug de carel.
-  Tok dan baikus, ubai bajjadik batuk mende kimur ya Nyek.
-  Ubai baicip nu batagari sambel igensir kiceryak ha cereg ku kemil jehuk.
-  Tengah baibesimbang, baigerteg hiyang jug ku celot ubai.
-  Ku nanek jis telas baikekkej, igensir kipakat ikenah mamuh ku batagari.
-  Hamerek lei nu batagari, tibak-tibak igensir kiserloh lubog ru sikloj ijug.
-  Ku nanek kampug, mong nukelamin pai bajjekjeg.
-  Ajehloh jenadik Batuk Tentop.

Info

sikloj = carel
hiyang = himak/engrok



Bei Bedindag



EKTIVITI

1. Cerngai laguk abik.
2. Neng gambar ru isik tempat kusong.
3. Dindag laguk ru ui gaye.
4. Cipte nanek rangkap laguk pai ha menatag kilek.

Menatag Cermor

Mergas telade mergas
 Mergas jeoi cerite
 Mergas berog _____
 Ilemunj _____
 Kuat ikeknap

} 2x



Becog penateh becog
 Becog _____ iberog
 Tapik _____ ikelop
 Piker tok leap
 Bahayak pen kidos

} 2x



Kelag telade kelag
 Kiheg _____ ku suwig
 _____ tapik bor sengik
 Amen agek-gek
 Kiget kelahik

} 2x



Ceroh penateh ceroh
 _____ ha mengkah gecek
 Jagak kiperop mengot
 Kikanghu gecek
 Had kaha top.

} 2x



Irama laguk:
Gelang Si Paku Gelang

Info

telade = jadik bengwal

NOTA GURU

1. Bimbeng mureb senarei ceneg menatag kilek de naipileh.
2. Bimbeng mureb cipte rangkap pai jijoi senarei ceneg.



Engrok Seru

EKTIVITI

1. Isik tempat kusong ru engrok seru de sesuei.
2. Lakon nej cerite jioi intonasi ru sembot de betol.
3. Beh ayat gunakan engrok seru.

Kayat Baluk Mengkag

Baluk Mengkag bipateh mende bor imatmoh. Gus ajuh, Tereg, Lengos ru Kukag naiha beserag batan Baluk Mengkag. Yah adeh, enai naiberimpun ku deg Baluk Mengkag mende naiha belwal hal de tejadi gus ajuh.

Baluk Mengkag: Hik hiberimpun ku yah adeh mende hiha semanj maap ratak lei. Eng ngrugak kayat matmoh hibekatan.

Tereg: Yeloh Baluk Mengkag. Eng hamerek nyep lempog mende birel ngcereg.

Lengos: , amen ngpane jadi kayat adeh eng an tok ngkelahik ru engkek! Eng gecat tabok teg ya yoj tikak ngsor rog.

Baluk Mengkag: , bekan nghalei bematmoh ku padeh!

Lengos: Harok hiha beh mende hijoi ha nus.

Kukag: , eng ngkenjip lekat nyik ku pangkal sentak!

Lengos: Yama de hek neh?

Kukag: , sentak eng gecat kikap ya Tereg!

Tereg: Eng semanj maap Kukag. Eng birel nghanat tapik telas ajuh sengik eng kipecing.

Baluk Mengkag: , nunoh nej agok hijoi ha nus! Hik pen hirugik.

Kayat ajuh lei hunen lengos mong had empat ijaras, kukag kuntut isentak ru tereg beubah ilempog.



Info

bekatan = kelahik entoi
 bekan = bukan
 tabok teg = kening teg
 cereg = nyeh/renyah/pan hai

NOTA GURU

1. Peterang engrok seru.
2. Rujok Kod QR.













Cerngai ru Belwal

Info

kipoi = kikerul/kijop

Teu Kunur

1. Cerngai cerite abik.
2. Cerlah subjek ru predikat de mong ku cerite.

Subjek	Predikat
	
	
	
	

Muh Teu Kunur beasal ju cermor mai engrak manah. Ku nanek kampug de rek beg batagari, mong nuperingak naigei ku kemil jehuk. Kateh peringak ajeh mong apak, amek, nar urag kenon sayet ru ajak.

Ku nanek jis, apak ru amek baisayet ajeh baiha et nu kampug kilek mende mong kenurik. Kampug ajeh inyagnak nik tenem ceknip jug. Peksendok baiet, iapak baisayet kibesat nu iamek dek kijagak ikekenon abor. Ilei kipasi an tok baijug memerip tenem.

Ku ikelem, tengah iajak kilai ceruk, ilei kigerteg imuh bicereg. Engrok cengreg ajeh rek beg deg. Ilei kiserngik ikenon litau tok jadik kiet nu kenurik. Ilei kineng nu pabeg barukloh tepecing inus ajeh nyiknyuk be ikenon. Iajak kipanei ajeh engrok mergas kijaled sengoi. Mergas ajeh kibelihar-liwar kerop deg. Iajak kikep cerendig kaha serngoh mergas ya kunur. Ilei pen kirop os ru kipoi kunur ajeh. Bile kunur ya beket, kipakat icecenok dek baikarau akuat mase kiperjer kunur nu batik.

Iajak pen kiperyog kunur sambel icecenok baikarau kuat. Kunur ajeh hembag kiyog batik. Mergas teros kijerop mende kiserngik mong sayet kijer ju kendeg. Bile kijerbak kunur ajeh, mergas kikarau ya beket. Ilei kijar nu batagari ru kiselap kateh teu. Ajehloh asal muh Teu Kunur.

NOTA GURU

Bimbeng mureb cerlah subjek ru predikat.

Sengngoh Nyek

Cermor Nyek meratak lengrik,
Bijadik batuk ya empag saktik,
Kipeder taleh teros kijadik,
Bisengoh ya mai bidek ku sengik.

Birel tok tahan mulak kek akal,
Catuk cerendig bien nu belwal,
Kelahik-bekelahik lei belal-belal,
Ku ipenyudah capei nanek hal.

Bibercip akal mulak bikerjak,
Tiktok numom pen mase ha dekdak,
Bicerot awat dek lei nu puncak,
Iteninggik nu Nyek naiha pesamak.

Awat bicekot biwad nu batik,
Bipoj Nyek tibak ceknip kiyoh tik,
Naipoj had sabar sileh naibegantik,
Naiha serngoh Nyek dek kiberentik.

Nyek kilaluk seranyep jis dui,
Bitet cog awat kiripal ikui,
Kikekjet bernor iruwai kicicui,
Kiserngik bikap entah ma de biui.

Nyek kijar kidek nyak ju kenjeh,
Ma icemenak de kuat pajeh,
Paknyak ya awat kipateh ajeh,
Jadik isengngoh leiloh ditehjeh.

- Lapas syaer gunakan intonasi de betol.
- Jawab sensual penengham.
 - Yama dij mai bisengoh Nyek?
 - Bok de catuk cerendig naiha serngoh Nyek?
 - Begeiharok icare naiha serngoh Nyek?
 - Amen engkek mai kampug ajeh, ma care kilek ha serngoh Nyek?
- Senarei cermor Nyek de pernah engkek gerteg atao bacak.



NOTA GURU

Og cuntoh memerip cermor Nyek ju bebegei sumber.



Gemenak Kak Kijaled Pawog

-kampug-rengrop
-tok kep-naiha buruk
pawog-kigerteg ya
cemenak kak



-cemenak kak kijaled
pawog-kilenglod-ilei kaha
cak sengoi




-buruk pawog-kipasal
care berkep kak-cerlog
kerdor makok



-mai kampug naiberhal-cap
kerdor makok
-mol kampug



-kerdor makok-biha
cerlog pateu-kikep
cerendig-nyik kaha
perekyos



-bien jar ya igensir
-was kilek-nyak ju
mai kampug ajeh



NOTA GURU

Bimeng mureb cerot cerite gunak prasa de biog.



Bei Besajak



EKTVITI

1. Lapas sajak jioi intonasi ru sembot de betol.
2. Senarei muh cermor jioi cerenglah de mong ku sajak gunak pete peniker.

Cermor Mai Manah

Cermor
Sernuk gerteg cermor
Sernuk bacak cermor
Cermor saknike cermor
Kibeh nus hik tehabor

Cermor sengoi
Cermor menatag
Cermor cemenak
Cermor peteri
Cermor rajak
Kiajar ceti sinui

Jenim becampor ya cermor
Sedeh, sengoh, sengral, belal
Jenjap, leklug, serakngik
Jis higerteg ru bacak cermor
Kibeh sinui hik beertik

Bei gerteg
Bei bacak
Cermor kitamah lemu
Cermor kiog neajar
Cermor kiperbor sinui.



Info

saknike = bebegei

NOTA GURU

Bimbeng mureb beh senarei muh cermor de naibacak atao gerteg.



Peribahasa



1. Ceryak peribahasa de mong ku nepetek.
2. Og ceti peribahasa ajeh.
3. Pileh nik peribahasa ru beh ayat.

Asal Engkuk Kibeengrok Kuat

Ku jaman entem, Engkuk ru Pinui ialoh danlei begei hik. Liubai ialoh tenek menang. Ku nanek jis, Engkuk kipasal nu imenang kaha pekput. Lei ku nutarek kening wig, ilei kibakek memerip ikor cep naidep ku icag. Engkuk kaha put cep ajeh. Ilei pen kilep ku englag jehuk ru imat tok kerber kineng cep ajeh.

Birel kineng cep ajeh, imat kisalep kineng cep kijaled peteri. Had ibernor matmoh peteri ajeh begei bungak seteg. Engkuk kiperek nu peteri. Peteri kior Engkuk huj nu ibadeg. Engkuk pen kihuj tapik ilei kigei ku kengleh. Peteri kior Engkuk muj nej nu kateh deg mende kaha jamuk canak. Engkuk pen kimuj nu padek deg. Tibak-tibak, Engkuk kisedar ilei ku lemug wig. Engkuk kikerek ilei ya mong ku pajeh. Peteri ru deg de bor nyep ju inenneng. Paknyak neh imat kisalep nu asal.

Ilei kisengoh kaha celeh mende birel tinggik ku lemug wig. Pelahat-lahat ilei kikakek celeh nu batik. Ku semakdek cengleh, ilei kijerakmuh ru nuikor lukak os. Lukak os ajeh kikerij kaha kap. Ilei kiharak lukak os ya belau tapik sek. Telas ajeh, kipej ileg tapik lukak os tok ngerwit ikid. Ipenyudah, Engkuk tiktok nej arap de boleh kipej. Ilei kicerwed nu direh ru kineng iarap bejuheg ku patik. Suntok isengik, ilei kibertej nu batik mende kiserngik kening wig ajeh patik. Bile kijer ku patik, iengrok jerner had ikengwat lei bigerteg ngenap lengrik. Engkuk pen kidendat lehem cep. Isenglog bor, imenang kidalag engrok jerner ajeh. Ilei kijampik ru kisempui renis itenek. Kas kop ru remet, ya jenampik imenang ajeh, itenek keskos kikus. Ajehloh asal Engkuk kibeengrok kuat telas lintar.



Info

danlei = sengoi biasa
 kisalep = sek nenneng
 lukak os = binturong
 kikerij = kihir/menderam
 cerved = telag
 bejuheg = bejehei/besepah
 lintar = kilat/belit
 kikerek = kihiran

NOTA GURU

Rujuk Kod QR ha ceti peribahasa.





Cerngai ru Belwal




EKTIVITI

1. Cerngai audio.
2. Belwal ha serag de mong ku Malaysia jijoi audio.



Serag Newares Hik





1. Bacak ru berkep maklumat ju nepetek.
2. Amen engkek kenon Bah Jasman, ma penutos engkek ha ceknip ajeh?



Bah Jasman kijak kekenon cekcip nu serag beejlag. Ilei kihod ikekenon naiog penutos naiha cip ka tok nu serag beejlag telas naibacak maklumat ku laman sesawang kerop adeh.

Serag Beejlag

Serag beejlag bikernal sebagei *Mossy Forest* ialoh nanek anugerah alam de paleng yunik ku Cameron Highlands, Pahang. Serag beejlag adeh mong neindah rupe mentok ru flora serte fauna de bekengrek bigemar et ya pelancong rual. Serag adeh iteninggik kirak-kirak 1,999 meter (6,561 kaki).

Serag adeh tebeg ya ejlag de belaer ju res serag lei nu lemug jehuk de kiog nenneng de bor ru damei. Selaen ajeh, mong jugak jehuk beentoi de kisui kateh serag. Jenim pegelap tamah bor amen besagup, jeud ru renis tik begei leknai kapet ya teninag matjis.

Mong sebagei banse flora ru fauna termuj oked serag, labuk engkuk, tenumbuh aktoparasit tik tinggik ru kacep patimah. Flora ru fauna kateh serag adeh kijadik tenumpuk lensa jurugambar ru mai tekrej amen naiha rakam neyunik serag.

Ceknip nu pintuk meknuj serag ejlag hilaluk nong timbok de biperneng ya nenneng selai teh Sungai Palas. Mong nelaluk gertak *walkaway* nu serag beejlag icenengreg 200 meter. Nelaluk adeh bisediak ya Jabatan Perhutanan termuj was parik ha neng nenneng de bor Banjaran Titiwangsa.

Serag beejlag adeh mong neyunik ilei ru bepotensi kijadik prudak nelancong sukan lasak pai. Ju kenjeh, dikdij pehak hod naibekerjaksamak ha peres ru kawal seliak teutame berengseh serag adeh dek kijadik newares pigoidoh.



Info

mai tekrej = pendaki
 bekengrek = benehiran/aneh
 labuk engkuk = periok kere



1. Pelenkap sajak gunakan nekate de sesuei.
2. Deklamasi sajak ru intonasi de betol.



Senglog Si Teu

bicemar

ikenutor

Kijenjap

bemorel

merlong

tanggungjawab

Jap-jap jis hik hicerngai
Kesah Si Teu de had isenglei
Kibisig nu hik tebeg iwas-was
_____ sedeh kikenang isenglog.

Manah entem
Iteu _____ kigel pen tenang
Kileklug indah tebeg khazanah
Kibebaktik nu jap-jap sengoi.

Hunen
Ilei kigel tebeg ipenglit nus
Mende _____ ya bejuta kenutor
Peralit isengik mende kibelal
Kibemusoh ru sengoi de tok _____.

Ajehloh senglog hek wahai Si Teu
Bipujak bile ilei had iberengseh
Biwes bile ilei had _____
Senglog Si Teu hadloh iyyak.

Wahai sengoi rimdij alam
Hikloh jenerasi jagak khazanah
Agok hicemar agok hipekutor
Hik selamat Si Teu _____ besamak.



1. Bacak cerite gunak sembot ru intonasi de betol.
2. Og care ha pelestari alam hik dek kekal lei ditechjeh.



Pelestari Alam Hik

Wak Carey, Wak Ipah ru Wak Sona naisusor beg teu naiha et nu serag bakao. Telas memerip minit naicekcip, lienai nailei ku was sayam. Lienai naiburuk mong dil ceknip pajeh.

“Cubak neng ku peteh,” Wak Carey kiternyul nu apah nanek was payak bakao de ya bipeterang. Lienai naicip nu apah was ajeh. Lienai naikekjet bile naineng jeoi tong de bilunggok ku pajeh. Mong tong de bekarat ru teloh. Wak Carey pen kibacak cerentat de bicertat ku tong ajeh.

“*Chemical toxic. Ammonium Chloride.* Mong mai bipej bahan kimia ku padeh,” urok Wak Carey nu ikekawat.

Tibak-tibak, lihui ngoi de had isengek ku engkap lienai. Wak Carey kaha merek kakkek bile kineng mong saknok menatag ya beberngah. Mong jugak kak de timul kemil teu.

“Bahan adeh bahaye ru kipemusnah sinui alam hik. Patotloh yas ceknap nelayan gu gek gus adeh. Hik hod hiripot nu pehak bekuase ha pekare adeh,” kiurok ya Wak Ipah.

Wak Carey ru Wak Sona baisetujuk ha cenadang Wak Ipah. Lienai naibepakat naiha ripot pekare adeh mende naiha pelestari alam ju sengoi de tok betanggungjawab.









Penjudoh Benilag ru Peribahase



1. Ceryak penjudoh benilag ru peribahase de mong kateh cerite.
2. Cerlah maklumat kateh mentok jadual de biog.

Penjudoh Benilag	Peribahase
	
	

Gej Betindak

Apak Wak Ipah kigemar kek kak. Gus adeh berengkep kak apak Wak Ipah gu gek. Apak Wak Ipah susah isengik kipiker hal ajeh.

“Ked ru sisak peknej ju kilang kicemar teu de kijadik sumber keknepe eng. Begeiharok eng ngha tanggung peringak?” Apak Wak Ipah kilesuk. Apak Wak Ipah kikenjip ilei begei cag karo amen tok berejeki kaha tanggung ha iperingak.

“Yas keknepe eng tok jeoi begei canuk. Kak ru sinui kateh teu gu gek mende batagari ya tecemar ya ked. Jenim batagari adeh had kipesedeh nus eng. Amen jenim teros begei adeh, eng hodloh ngkek kerejak kilek. Eng ngnyek cak bet taleh,” bisig apak Wak Ipah. Tibak-tibak, purpar engrok injen ruli ju apah mol teu. Apak Wak Ipah kikekjet.





Apak Wak Ipah kipersui iinjen mutu ru deras. Ilei kaha kernal pitak sengoi de tok betanggungjawab de naicemar teu ajuh. Ilei kaha petahan sumber alam de kijadik sumber ikeknepe.

Telas apak Wak Ipah kilei nu mol teu, ilei kilep pelahat ku engkap memerip pungkak awat ku beg teu. Ilei kaha petiye ma de belakuk. Ilei kikekjet kineng mong nar urag litau tengah baipej memerip kebek tong kateh teu. Apak Wak Ipah kijeled kenjeh pelahat. Ilei kinyek cak beres ha pekare adeh.

Apak Wak Ipah kicerite ha jenadik ajuh nu tok batin. Ilei nyiknyuk beentag cig tapik kinyek sumber ikeknek teros bipemusnah ya mai kilek. Tok batin kikit nyeh hal ajuh mende ilei nyiknyuk sengoi de beh kerjak serengkal. Tok batin kibejanyik kaha ripot jenadik ajuh nu pehak bekuase dek tenindak de betol bikot nu mai de naicemar teu.

Info

karo = awat sod
pungkak = perduk



Cerngai ru Belwal



1. Dindag laguk jjiio audio.
2. Bincang ha ceti laguk.
3. Beh nar banse menentok ayat ju nekate ikale ceher.



Tanyak Betanyak

Tanyakloh nu **matjjs**
Yama **perhol** cahayak?
Kijawab ya matjjs
Tanyakloh jehuk

Tanyakloh nu jehuk
Yama hod cahayak?
Kijawab ya jehuk
Tanyak oksigen

Oksigen kip**pergah**
Mende ilei penteng
Penteng ha bende sui
Ku kateh bumik

Sengoi ru menatag
Tenumbuh de sui er
Enai hod oksigen
Ha naibelehem.

Irama laguk: *Tanya Sama Pokok*

Mong nar
menentok ayat ku
kerop adeh.



Cuntuh ayat senusut biase

Kipergah hal de bor.

Cuntuh ayat senusut kaleh

Hal de bor bipergah.

NOTA GURU

Guru peterang ha banse menentok ayat.



Bei Bebacak



1. Paham ceti syaer.
2. Bincang care ha tulug jagak bumik.



Bengsat Bumik

Penileh Nanek

Wahai semuak cerngai cerite,
Cerite adeh perlei berite,
Bumik de higai Jenang de cipte,
Agok bedaleh ya mimang nyate.

Beiloh hijadik sengoi de pasak,
Ha alam kerileng hik hibeh jasak,
Jenagak alam memasig hirasak,
Hisui semyak ku bumik tok rusak.

Bumik adeh anugerah Jenang,
Hodloh hijagak hodloh hikenang,
Jadikloh sengoi, sengoi de menang,
Dek sinui adeh sukak ru tenang.

Ajehloh taleh ngperlei bengsat,
Bengsat nu sengoi ku sinui de pesat,
Nungenap alam bekaet rapat,
Begei geknel teu tok boleh hikerat.

Penileh Nar

Alam kerileng kenak hijagak,
Bicipte ya Jenang kenak hihergak.

Selak jeer kilambeilambeil,
Kipoi ya pinui gah bor kiperlei.

Sernuk hibelehem udare de bor,
Kibeh hik tenang sengngik kiperbor.

Ku kateh teu pitak kak naimenman,
Ajehloh tempat enai umpame taman.

Kening jehuk sui isinui had er,
Patik cereg ikale belaer.

Eng ngha muj
tenandig dindag syaer.
Belok nanek ha pileh?

Beiloh eng
ngtulug hek
pileh.

NOTA GURU

Bimbeng mureb pedindag syaer.



Bei Betules



1. Bacak ru paham nepetek.
2. Jawab sensual penengham kateh bob tules.
3. Ceryak nekate nuceti ju nekate de ikale ceher.

Eng Jeres

Eng jeres, eng luas. Bebegei banse tenumboh kisui ku kateh eng. Mong de cereg ru **patik**. Tenumboh de kisui er ru ikale belaer. Mong jeoi bernor de ngbeh ya eng.

Selaen ju tenumboh, pitak menatag jugak naigei ku kateh eng. Mong menatag entoi, kajeg ru ces. Dikdij bende **sui** adeh naihod oksigen ha belehem. Tenumboh ku kateh eng adeh naiperhol oksigen ru naiserap karbon dioksida.

Sengoi naimuj kateh eng mende enai hod kek rejeki ha penerlu lienai. Mong sumber penglai, jehuk ha beh perabot ru pitak bungak rimak de bor bibeh nehias.

Eng jugak bepungsi **sebegei** was terenggok teu secare semulak jadik ru boleh ngpesernej suhu bumik ju berengket global. Selaen ajeh, eng boleh ngsediak was nelancong de boleh kiperhuj ekonomi negare.

Iserengkol, eng adeh hertak dikdij bende sui. Eng boleh bigunak ya bangbok taleh. Jadik, hergakloh eng. Amalloh nus haknuk ha **jeres** dek dej bende de mong ku kateh eng boleh bikenjip ru bineng ya jenerasi pigoidoh.

Ma de mong ku kateh eng?

Ku serengngik engkek yama eng tok boleh biperusak?

Tenumboh ma de boleh bibeh penglai?

Senarei pungsi eng nu bende sui.



Bei Bepantut



EKTIVITI

1. Bacak pantut secare didek hibor.
2. Og ceti pantut jijoi irangkap.
3. Beh pete peniker ha nilei de bor kateh pantut.

Bile Alam Kibeengrok

Pelek jerig pelek perah,
Kikep ya atok had kikerakmik;

.....
.....

Telei nep ku kateh kutak,
Kiperhol ya Aleh kidek ku talam;

Jagakloh eng agok bicemar,
Mende teu bihod ya semuak.

Abat bibelik ku Bah Amar,
Iragik bor bebungak-bungak;

Bende tajap agok himan,
Langkah-selamat hodloh hikot;

.....
.....

Jukloh hicet bebegei tenumboh,
Dek belae ku ngenap lengrik.

Cenan ru lod agok pebotak,
Kisarep tik bekan ya alam.

.....
.....

Jagakloh bumik de bianugerah,
Dikdij sinui ku kateh bumik.

Beh kerjak agok betimpoh,
Amen betimpoh pesusah dirik;

.....
.....

Harok ha sedot udare nyaman,
Amen jeres biteroke bitot.





Engrok Edjektip



1. Bacak sajak.
2. Bincang ha ceti sajak.
3. Ceryak ru senarei engrok edjektip kateh mentok pete peniker.

Sengik Alam

Eng nghod begei manah
 Eng nghod eng berseh
 Manah eng tik ngyam
 Tik ngces
 Manah jeoi mai bihergak eng
 Tik bisukak
 Tik cerie



Eng ngnyek begei hunen
 Hunen ya ngraknak
 Tok kuat
 Ya tecemar
 Hunen jeoi mai biperusak eng
 Semedang ngsedeh
 Senalo ngjenjap

Tapik eng ngpane
 Eng lekat bihok
 Mende mong sengoi de bor
 De boleh kijagak eng
 Bumik de raknak adeh





Cerngai ru Belwal



EKTIVITI

1. Kernal ru sebot bende de buleh bigunak semulak de mong kateh gambar.
2. Beh pete peniker ha perneng bende de buleh bigunak semulak ru itenujuk.
3. Beh kenarag patek ha cerite bende-bende de buleh bigunak semulak ju pete peniker.

Gunak Semulak



NOTA GURU

Bimbeng mureb kernal bende-bende de buleh bigunak semulak ru itenujuk.



Bei Bebacak



EKTIVITI

1. Bacak nepetek ru sembot de betol.
2. Kernal maklumat tesurat ru tesirat ju nepetek.

Bajak ju Sisak Caknak

Jeoi mai tok bipanei sisak caknak boleh hipejadik bajak. Jap-jap jis hipej sisak caknak ku tong ked. Sisak caknak de hipej ku tong ked ajeh an kiberngoi ru kibeberngah amen hibiari leu. Masalah ked berngoi ru beberngah adeh boleh hipergek ru hibeh bajak ju sisak caknak.

Ku imulak, sediak tong dram atao ma-ma bekas kek mong peneudare de bor. Telas ajeh, tapis sisak caknak kek keaj dek tok berteu. Sisak caknak kek na betapis hiisik kateh tong dram atao bekas betutup. Cup kompos kek na siap ku sisak caknak ajeh. Kompos boleh kipergej pruses neurei sisak caknak. Kompos boleh hibelik ku pasaran amen tok dapat hibeh ya lei.



Jap nar nyenis, gaol sisak caknak ru kompos dek udare boleh kimuj ha tulug pruses neurei. Telas higaol tutop tenutup bekas arapat. Bekas hod senalo hitutop. Pruses adeh hod hiulag-ulag jap-jap nar nyenis. Telas nar minggu, bajak ju sisak caknak na siap ru boleh higunak.

Amen ha pasti pruses ha beh bajak ju sisak caknak adeh bejaye, ku ijis kek nar boleh hirasak bekas betutup ajeh beket atao tok. Amen tok beket mungkin pruses bajak ju sisak caknak adeh tok bejaye.

Info

kompos = bahan organik de teurei ru bikitar semulak sebegei bajak

kek = de

Tesurat	Tesirat
Cuntoh: 1. Gunak bekas kek mong peneudare de bor.	Cuntoh: 1. Dek bakteria de mong kateh kompos kisui.
2. Kompos boleh kipergej pruses neurei sisak caknak.	2. 
3. Bekas hod senalo hitutop.	3. 

NOTA GURU

1. Bimbeng mureb kek maksod tesirat ha jap maklumat tesurat de mong kateh jadual.
2. Or mureb kek maklumat ha beh kompos ju Internet.



Bei Betules



1. Bacak cenatat nunyenis ru sembot de betol.
2. Tules secare mekanis cenatat nunyenis dairi Bah Anip.

Cubak-cubak Taleh

8:30 pegelap

Eng ngngeng jeoi barang tepakei enggei butol pelastek, butol kaca, pipe manah ru tiob meskar kateh setor ku kenog deg. Amen ha pej, betamut ku beg deg. Gus ajuh, mong ngbacak atikel care ha ubah barang-barang tepakei adeh jadik bende pai de boleh higinak semulak. Poj ngkek maklumat ju Internet care ha cipte bende pai ju barang-barang tepakei.

9:00 pegelap

Eng nglayari Internet ngha kek maklumat ha beh barang nehias deg ju butol pelastek. Had ibernor! Eng ngrasak ngha beh jugak begeh ajuh.

9:30 pegelap

Eng ngcetak maklumat de ngkep ju Internet. Eng ngbacak nej care bahneh pasuk nehias ju butol pelastek. Eng ngkot butol-butol pelastek de mong kateh setor. Eng ngjoi peraneke-raneke icare bahneh lei dij.

10:00 pegelap

Eng bejaye ngbeh pasuk nehias ju butol pelastek. Yey, had isernuk ngkenjip! Eng ngperneng nu amek yas kerjak teg eng. Amek kikenjip bangge ha eng. Ilei kior eng beh ajeoi mende boleh hiog nu mai sebegeh tandak teg.

10:30 pegelap

Eng ngbeh empat kebek pasuk nehias nej jijoi care de samak begeh nekjuh. Bile na siap, ngsusut kemil pak bob. Amek kipateh ha yas teg eng. Eng ngkenjip bangge ru sernuk mende ngbeh nunaneke pekare de begunak ru kekrip.

Info

betamut = belunggok/betimbon



Bei Becerite



1. Cerite langkah-langkah ha beh pasuk nehias jiji gambar de biog secare kretip gunak idea lilei.
2. Beh nanek kenarag patek secare belwal ha pasuk nehias.

Care-care ha Beh Pasuk Nehias



1
Alat ru bahan de hod mong ha beh pasuk nehias.



2
Teg lebel ju butol pelastek.



3
Koh cerenglah kemil butol pelastek joi teninggik pasuk de hihod.



4
Celes cerenglah kemil butol nu memerip cengles de hihod.



5
Terloh lubog ku cerenglah kerop joi neentoi cengles butol.



6
Wet ru sad cengles butol ku lubog de biterloh.



7
Certat ya gam pelastek dek cengles butol kigei nulok ku lubog.



8
Hias pasuk de siap joi kretiviti lilei.

NOTA GURU

Bimbeng mureb ha becerite secare didek hibor.



Neimboh ku Ipadek



1. Bacak nepetek de biog gunakan sembot de betol ru jelos.
2. Kek nekate neimboh ku ipadek de mong kateh nepetek.

Engrok Dasar	Nekate Neimboh ku Ipadek
perlu	penerlu

3. Beh ayat gunakan nekate neimboh ku ipadek kateh konteks de betol.

Prujek Seni Visual

Cikgu Anjang kajar mate pelajaran Seni Visual ku kelas Bah Anip. Mol minggu adeh, Cikgu Anjang kihod enai beh penamer yas seni memasig. Dikdij mureb kior beh paleng gek nanek yas seni. Bangbok de boleh kibeh lebeh lagik bor.

Bah Anip kibecadang kaha beh diorama gunakan kutak ru pipe. Ilei kipileh tema sinui ku kutob. Bah Anip kaha beh arca penguin ru sinha laot ju pipe manah. Cikgu Anjang pernah kajar enai care-care ha beh arca menatag ju pipe gunakan teknik *papier-mâché*.

Mase de mong ha beh serengyap peksendok penamer tik limak tenem. Bah Anip had isenibok. Ilei kaha seryap gej idiorama ajeh. Jap-jap dui, telas sekolah ilei kibeh idiorama.

Amek Bah Anip kiog semangat ha ikenon dek kiseryap ikerjak ru bejaye. Iamek kibesat dek ilei kijagak isenelamat mase kibeh iprujek. Bah Anip kijoi bengsat iamek.

Nunyenis peksendok jis penamer, Bah Anip kiperneng idiorama nu Cikgu Anjang. Cikgu Anjang kikenjip megah mende imureb bejaye kibeh diorama ju usehe ilei.

Cikgu Anjang kicerite nu Bah Anip penenteng ha beh penamer seni visual adeh. Imentol, penamer adeh bibeh mende kaha neng usehe mureb-mureb. Cikgu Anjang kipeder, Bah Anip numom mureb de rajit kaha beh penamer adeh. Cikgu Anjang senalo kikenjip megah ha imureb.

Info

papier-mâché = kateh engrok Perancis iceti kertas de biperceh





Cerngai ru Belwal

1. Cerngai ru semak benacak kawat.
2. Jawab sensual penengham tiktok engrok tanyak secare belwal.
 - (a) Ku Sekolah Kebangsaan Cenana Pekrik ektiviti gutong-ruyong adeh biui?
 - (b) Had mureb sekulah de telibat ru gutong-ruyong adeh?
 - (c) Berengseh was sekulah taleh itenujuk ektiviti adeh?
 - (d) Ektiviti begei adeh bor? Ku peniker engkek?



Kempen Berengseh Was Sekulah

KAMPAR, 20 Februari – Persatuan Ibu Bapa dan Guru (PIBG) Sekolah Kebangsaan Cenana Pekrik ru kerjaksamak Jawatankuase Kampung Cenana Pekrik naibeh ektiviti gutong-ruyong sempene Kempen Berengseh Was Sekulah.

Ektiviti gutong-ruyong adeh nanek care pehak sekulah, PIBG ru jawatankuase kampug naiha berseh ru cerie was sekulah dek mureb-mureb naibelajar ru selese. Kilek nej, program adeh bibeh ha pejadik was sekulah selamat.



Kerjak berengseh de bibeh mase jis gutong-ruyong adeh ialoh misen nyok ku padag sekulah, pej engleg-engleg jehuk ru papat kek mong engkap was sekulah, cucik trayel ru kekilek nej.

Ektiviti gutong-ruyong adeh kiperek nehubug antare pehak sekulah ru masarakat peninen.

NOTA GURU

Bimbeng mureb jawab sensual penengham tiktok engrok tanyak.



1. Bacak nepetek ru sembot de betol.
2. Og ceti ha nekate ru rangkei kate de bekale kateh nepetek.

Tenandig Jambat Berseh

Was sekulah de cerie ru berseh kijadik nanek tandak **warge sekulah** had naihok ha sekulah. Program Tenandig Jambat Berseh Perinkat Sekulah ku lengrik Perak adeh secare tok langsung kisemei budaye hijagak ru hiamal berengseh jambat. Kilek nej, program adeh pen buleh kiperhuj imej sekulah ku mat **mai jengoi**.

Moto de bipileh ha program tenandig adeh ialoh "Jambat Berseh, Jik Jisukak". Tenujuk program adeh ha pehasel mureb dek kigemar beh neamal berengseh ku isinui. Moto adeh bipileh mende ha perlet sengik mai jengoi ha jambat de bigep sebegei nanek tempat de kutor ru **besenger**. Hik hod hikaleh **pesepsi** mai jengoi de naigep jambat sebegei tempat de tok payah hijagak iberengseh.

Program tenandig adeh ha og senendar nu mureb. Bangbelok taleh nai et, hod senalo naiamal jenagak berengseh jambat.



Info

jambat = tandas

Ceti nekate ru rangkei kate.

besenger

= 

mai jengoi

= 

pesepsi

= 

warge sekulah

= 

NOTA GURU

Bimbeng mureb kek ceti nekate ru rangkei kate de biog.



Bei Betules



EKTIVITI

1. Belwal ha maklumat de mong ku poster Kempen Care Sinui Sihat.
2. Beh neulas ha kempen ju maklumat de mong ku poster ru jadual de biog.

Was Berseh Berog Sihat



ma

ku belok

bok imai

lempu

Pekare	Tenenrang
Ektiviti de bibeh	<ol style="list-style-type: none"> 1. Senamrobik. 2. Ceramah “Amal Berengseh Asas Senihat”. 3. Tenandig bekale poster. 4. Tenandig lukes poster. 5. Cek senihat. 6. Penamer senihat. 7. Perenneng care cucik teg de betol.
Paedah	<ol style="list-style-type: none"> 1. Panei care ha jagak berengseh lilei ru was. 2. Amal berengseh was kateh sinui. 3. Amal sennam kateh sinui ha senihat.

NOTA GURU

Bimbeng mureb beh neulas.



Bei Bedindag



EKTIVITI

1. Sebot lirik laguk de biog.
2. Tules neajar de mong kateh lirik laguk.
3. Beh perenneng secare didek hibor.



Sengngej Teu Huper

Sengngej sengngej sengngej teu huper
 Serog ikenenjip hicheh ku berog
 Alaopen sengej hod mamuh huper
 Barukloh kenjip segar ku berog

Sengngej sengngej sengngej teu huper
 Amen tok mamuh berngoi berog
 Alaopen sengej hod mamuh huper
 Barukloh kawat kigemar perop

Sengngej sengngej sengngej teu huper
 Sengngej ikenenjip lei kerog berog
 Alaopen sengej hod mamuh huper
 Barukloh neajar kimuj nu kelop

Sengngej sengngej sengngej teu huper
 Agok sip sep sabon ku berog
 Alaopen sengej hod mamuh huper
 Barukloh belajar hikenjip sernuk.

Irama laguk: *Rama-rama*



Engrok Muh Am Abstrak ru Engrok Muh Am Konkrit



1. Perati abik gambar.
2. Senarei engrok muh am konkrit de mong kateh gambar.
3. Beh ayat gunakan engrok muh am konkrit de mong kateh gambar ru engrok muh am abstrak de sesuei.

Cuntoh:

Engrok Muh Am Abstrak	Engrok Muh Am Konkrit
ibernor	taman rekreasi
Cuntoh ayat: Ibernor taman rekreasi ku was ginei eng bipateh ya mai jengoi.	

Berengseh Was Kerileng Tanggongjawab Hik





Agok Jendak Sumber Alam

Populasi sengoi ku duniak jap-jap tahut gu betamah. Ku mase adeh, populasi sengoi ku duniak mong 7.6 bilion. Bijangke ku tahut 2050, populasi sengoi ku duniak an lei 9.9 bilion.

Bile populasi sengoi betamah, penerlu ha sumber alam pen kibetamah jugak. Sumber alam de penteng kateh sinui hik nunyenis ialoh sumber teu ru caknak, tenage letrek, deg, leknog, teknologi ru kekilek nej. Dikdij sumber adeh had penenteng ha ranis hik.

Amen ha tampong penerlu hik nunyenis, sumber alam adeh hod jeoi biperhol ru bigunak. Sebegei cuntoh, sumber utame caknak hik ialoh ju tenumbuh. Serag de mong bigik, biberseh biha beh selai ceknet senubai, ladang sawit atao was menatag pengres.


Hik hikep sumber tenage letrek ju neempang. Amen bibeh nanek neempang pen, hik hiperlu was de luas. Penerlu ha beh deg pen nanek kayat serag biteroke. Gu jeoi sengoi, gu jeoi deg de bibeh.

Begei ajeh jugak ha leknog. Leknog adeh isumber utame ialoh kapas. Gu jeoi leknog bibeh, gu jeoi kapas de bihod ha tampong penerlu adeh. Ju kenjeh, gu jeoi selai kapas bibukak.

Lemu penanei kek gu bekembang bigunak ha cipte bebegei teknologi pai. Sebegei cuntoh, hunen boleh bibeh leboh raye kek kirentas serag ru cenan. Adeh nanek kayat serag gu gek.

Genunak sumber alam secare beleluase an kiguj amen tok bipantao. Ya kayat ajehloh, sumber-sumber alam adeh hod bigunak secare cercor ru agok pejendak.






Pekukoh




1. Kek nekate de biog.



T	E	R	N	Y	U	L	Y	P	E	N	G	L	I	T
A	L	E	N	G	O	S	O	T	D	P	I	S	I	G
M	O	B	C	K	A	Y	G	A	B	U	G	I	M	W
T	A	C	U	C	P	U	J	K	S	I	L	H	C	A
I	K	L	E	H	U	I	Y	O	R	Y	T	U	E	S
N	M	O	R	K	N	H	L	N	A	N	R	G	K	D
G	E	C	T	S	C	I	R	G	T	I	G	H	O	E
G	N	Y	U	E	D	E	G	K	U	R	A	K	P	R
I	G	B	M	A	R	H	T	P	O	J	B	T	Y	T
K	O	Y	A	L	S	A	J	U	L	I	H	G	S	P
U	T	I	L	O	R	E	N	T	H	A	W	B	U	E
P	S	E	K	S	U	G	J	G	G	E	N	S	I	R
E	Y	M	A	N	E	S	H	B	R	I	Y	A	T	L
B	A	K	O	L	Y	R	U	S	T	H	U	G	H	E
S	U	W	I	G	K	T	E	N	A	N	G	M	O	T

2. Beh pete jehuk cerlah nekate de mong ku kemil jjiio ibanse.



"Lemu penanei ialoh senjatak had bekuase de buleh higunak hiha ubah duniak."
- Nelson Mandela

TEMA 3

DUNIAK LEMU PENANEI



1. Sesayet kateh gambar sanggop betengrek ha et nu sekulah. Yama?
2. Begeiharok lemu penanei buleh kijadik senjatak de buleh kiubah duniak?





Cerngai ru Belwal



1. Beh sensual ha maklumat secare bepasag.
2. Besual jawab ha berkep maklumat tenamah ha kerip sumber alam.

Gunak Gek

Pergek geknik jehuk

- pergek genunak kertas
- cet nunoh nej kening jehuk
- kitar semulak



Kerip teu

- muh teu pancor
- ceh tennam gunak teu tenakong atao teu manik
- suj leknog bile ya jeoi

Kerip letrek

- bukak tingkap ku iyah
- perlet suis amen tok higunak
- gantik ya tenage matjis



Info

kerip = jimat

NOTA GURU

Bimbeng mureb berkep maklumat.



Bei Bebacak



EKTIVITI

1. Bacak maklumat secare jelos ru pintan.
2. Sebot rangkei kate bekale ceher ru bincang iceti.
3. Beh ayat lilei ju rangkei kate.

Selamat Kening Jehuk

Cikgu Bah Eyas kiperneng dokumentari ha genunak kening jehuk. Kening jehuk penteng mende kiog oksigen nu sengoi. Jeoi genunak kening jehuk adeh termujloh bibeh kertas. Jap-jap jis, hik higunak kertas betenujuk ha senapod arap, cenetak ru bahan ceknot. Amen hik higunak birel jeoi kertas an gu jeoi jugak kening jehuk bigik. Ju kenjeh, mong memerip care ha selamat kening jehuk rong bigik.

Hik hingeng maklumat secare **kemil cencog** begei e-mel, **bengsat patek** ru telipon.



Hik higunak englag-malag kertas ha becetak ru cekcot.

Hik bigalak higunak **senalit leem** begei mentok vidio atao audio ru pergek **senalit cegeh**.



Hik hod hijoi kempen tennam nunoh nej kening jehuk.

Hik hod hiamal **kitar semulak** kertas de ya higunak.





Bei Betules



1. Bacak maklumat ru sembot de pintan.
2. Kernal ru tules isik penteng ju maklumat kateh mentok pete peniker.

Pulehperei Batagari

Jagak berengseh batagari ialoh tanggungjawab dikdij masarakat. Amen batagari kitecemar an kiog kesan negetip nu rimdij sinui. Hik hipanei batagari nanek sumber sinui. Kayat ajeh hod hijagak dek kikekal bor ha jenerasi pigoidoh.

Antare care jenagak batagari ialoh:

1. Mai gei pajeh ru rukun tetangge naibegutong-ruyong kutep ked begei pitak butol, pelastek ru cag-cag jehuk.
2. Og pendidikan awal ha jenagak alam kerileng ku perinkat sesayet.
3. Pegalak kempen “Hok Batagari Hik” ru senebar maklumat ju media massa ru media cetak.
4. Og ceramah ru dek maklumat ha cenenmar batagari ku was deg ha og senendar nu mai jengoi.
5. Undang-undang bikuatkuase ru naiperekse was genei.
6. Pehak bekuase naikernak dendak ru saman nu kilang de kisarol sisak toksik.






1. Neng gambar abik.
2. Bacak maklumat de mong ku gambar.
3. Beh nelakon ha care bahneh cocopeat jjiioi pete aler.

Cocopeat Bahneh Eng



sediak sabot jeer



alat genarot



garot sabot



garot lei halos



cerlah kek kasar



buleh hicet



Engrok Kerjak Ektip ru Engrok Kerjak Pesip



1. Lakon dailog ru sembot de pintan.
2. Beh ayat ju engrok kerjak ektip ru engrok kerjak pesip de mong ku dailog.

Bor huper, abah. Akad, jeoi senubai jun! 1

Bor jugak jun cet care hidroponik adeh. 3

Ha roj senubai ku bekas kek belok, abah? 5

Jik pen mong jugak biajar ya cikgu ku sekolah care adeh. Jun kerjak haleika? 7

Abor haknuk, abah. Eng ngharap betamah rejeki jun. 9



Cet Abor

2

Bor huper, Bah Ajim.
Mongloh gek-gek iyas
amen hirajit cekcet.

4

Hooh, boleh hikerip
was ru tok hiperusak tik.
Racot cekburek pen tok
payah higunak. Bei tulug
eng roj senubai.

6

Roj senubai bekas
kek adeh.

8

Sumur kitulug ya awak.
Bah Hakim kitulug eng
amen kicuti semester.
Cukuploh senubai har
adeh. En lilik ha hek.

10

Abor haknuk.
Juk har jug.



Cerngai, Belwal ru Bebacak




1. Neng gambar abik.
2. Belwal ha pekare kateh gambar gunakan genenlar de betol jijoi watak de biog.
3. Bacak nepetek ru sembot de pintan.
4. Senarei isik penteng ju nepetek.
5. Bincang care perlei maklumat ha bahaye nyaknik bejangket nu mai jengoi.

Ceramah Senihat


Bei Ngtulug

Yah adeh biui ceknek senihat ru ceknek lemunj ya pehak Klinik Kesihatan Daerah Kinta ku sekolah eng. Eng ru ahli Kelab Doktor Muda bior tulug pitak misi ru doktor.

Jenim 1

 , mureb-mureb tahut enam ya naibebares ku rual.



Bor huper  . Adeh kad lemunj ru senarei muh mureb Tahun 1 Utarid.

Jenim 2



Bor Hicegah

Influenza i aloh nyaknik de kien ya virus influenza de kijangket cog lehem. Ilei buleh kipekayat gejalé jenangket de hayok ataopen series. Kateh jenim tetentuk, ilei buleh kiancam nyawak nenumom de kijangket. Mai jengoi bibesat dek naijagak berengseh lilei ha ilak ju hikenak nyaknik. Selaen ajeh, gej buruk dokter amen mong itandak-tandak.

Bok de berisiko tinggik ha kenak influenza?

- Sesayet beumor kerop limak tahut.
- Mai makok.
- Mai raknak beumor 65 tahut nu kemil.
- Sengoi de nyik kronik (nom ceet, behip tinggik, hop ru kekilek).
- Sengoi de lebeh inyahneh.
- Sengoi idaye tenghan berog de gek (kansér, HIV, ru mai de kiui nerawat kemoterapi).



Tandak-tandak

- bisag moh
- nyik rungkok
- selei
- kengreg leu
- ciret/kakkek
- tengor kui

Care ha Cegah

1. Suj teg ru sabon telas hikehol, hiteris atao hicap bangma de tecemar.
2. Tutop empag ru moh ya tisu mase hiteris atao hikehol.
3. Ilak was tetutup atao sesak ya mai jengoi.
4. Agok ngeng kekenon nu pusat jenagak sayet.
5. Log tenutup empag ru moh.
6. Kekenon biog cenucok vaksin influenza de buleh biberkep ku kelinik ru hospitel.

Info
rungkok = tekak



1. Bacak maklumat ru cerngai audio abik.
2. Dindag laguk ru beh gerak berog de sesuei.
3. Senarei bahaye pelastek nu alam.
4. Tules care ha peilak peknej pelastek rate-ratah jijoi maklumat.
5. Senarei nilei bor ku lirik laguk.

Pelastek Bahaye?

Sengoi ru pelastek begei tok buleh bicerlah mende jeoi mai begantong nu genunak arap pelastek kateh sinui. Buleh hipeder jap-jap deg mong arap pelastek. Ilembeh pelastek ialoh tahan leu, tok telap teu, bor imentok ru murah kijadik penileh mai jengoi. Hik tok hisedar pelastek adeh buleh kiperdat hik secare sengek.

Jeoi kes de bidokumentari ha sinui merin kidat kayat kicak pelastek atao kisog kateh sisak pelastek. Alaopen sinui merin ajeh tok kidat tapik bahan pelastek de kicak lekat mong kateh sistem iberog. Bile hik hicak sinui merin ajeh, hik an hikep nyaknik.

Perennyep sisak pelastek ialoh nanek tugas nyeh de mong usehe kolektif sengoi, organisasi ru kerajaan. Jeoi progrem gutong-ruyong biui ku ngenap pesiser pantei ya pitak sukerelewan. Ju semangat gutong-ruyong ajeh buleh kajar sesayet dek tok naipej pelastek rate-ratah.

Ju kenjeh, jeoi pantei gu berseh ru bor. Pehak bekuase an kikit tenindak tegas nu sengoi ru sarikat de tok betanggongjawab.

Info

merin = laot



NOTA GURU

Rujok Kod QR ha lirik laguk ru pecerngai nu mureb.



Neimboh ku Ipadek



1. Neng gambar abik.
2. Pelenkap nepetek ru nekate de kikandug neimboh ku ipadek de betol.
3. Bacak ru salit ku bob tules.

Lekat Bor



Sahom Valley Agro & Eco Resort ku Kampar, Perak ialah was cenuti bekonsep _____ alam semulak jadik de menarek. _____ engkap resort adeh had ibernor ru bijagak iberengseh.

Mong memerip pakej de bisediak ku padeh. Pakej adeh sesuei ha _____ bergu. Antare ektiviti ru menudah kateh pakej adeh ialah bekayak, ceknip serag, menudah kulam _____ ru bilek seminar. Rimdij pakej de bisediak iregak bepatot. Selaen ajeh, deg danem jugak bisediak amen ha _____.

_____ ku padeh ialah i _____ had i _____ ru segar. Ipenanggak caknak kijadik menarek mende bigunak awat ru selak telei. Resort adeh kipekekal berner alam semulak jadik dek kijadik newares pigoidoh.





SERNANG KERJAK DEG



Cerngai ru Belwal



1. Beh pete peniker ha berkep maklumat lekkemuk ajaib.
2. Lakon care berkep maklumat lekkemuk ajaib ku kedei letrek.

Wak Sona kaha berkep memerip maklumat lekkemuk ajaib ha prujuk bob skrep mate pelajaran Reka Bentuk dan Teknologi (RBT).

Info

kincang = lajuk/deras/
pantas

Lekkemuk Ajaib



PUNGSU DE BULEH BIBERCET:

- ✓ Menasak pelahat, pegoh, teop ru besubai.
- ✓ Serep nej caknak.

GAH DE BOR:

- ✓ Tok cektat.
- ✓ Ikateh entoi.
- ✓ Buleh kiper cet caknak seluneu lapan jam.

KINCANG★

Beiloh amek-amek. Juk hiberkep lekkemuk tenekan kerengwal jik de pai. Kincang an kitulug kerip mase memasak:

- Bebegei resepi canak - 5 minit
- Canak perid - 15 minit
- Bihun goreng - 5 minit
- Rendang - 45 minit
- Kek teop - 20 minit
- Sop jeag - 30 minit
- Kari pug - 8 minit
- Saknike resepi de engkek hod...

Regak asal: RM1000.00

Regak telas bikoh:

RM750.00

Bei berkep hunen!



NOTA GURU

Bimbeng mureb beh nelakon jenim berkep maklumat lekkemuk ajaib ku kedei letrek.



Bei Bebacak



1. Lapas pantut.
2. Jawab senual penengham.
 - (a) Kermuh alat de boleh kikerip mase kateh pantut.
 - (b) Begeiharok alat adeh boleh kikerip mase?
 - (c) Yama penggureng pes kitulug pesihat berog?
 - (d) Kermuh nej alat kilek de kipesernang kerjak deg.



Pekerip Mase



Jis manik menman padeg,
 Telas menman siap balek;
 Had isennang hibeh kerjak deg,
 Ya vakum robotik kiulag alek.



Ijis ya manik pek jadik suj abat,
 Senglog hik bor mong misen de hebat;
 Kisuj kisot ku nanek tempat,
 Hisoh taleh tik nelipat.



Leus jeoi tok selamat,
 Pergek senem jadik neamal;
 Hunen begureng pen ya selamat,
 Ya penggureng pes senem tekawal.

Ha jamuk ureng ha Wak Sisah,
 Ijis hamerek bukak puase;
 Mong bahneh ayes sinui tok susah,
 Gunak teknologi hikerip mase.



Info

hisoh = hiperhol



Bei Betules



EKTIVITI

1. Cerot maklumat gunakan penandak wacana de sesuei.
2. Tules maklumat ajuh kateh mentok perenggan ru gunakan tenules berangei.

Bei Masak Sop Jeag



NOTA GURU

Bimbeng mureb cerot maklumat gunakan penandak wacana de sesuei.



Bei Bedindag



1. Pelenkap seni kate laguk.
2. Dindag laguk ru ui gaye.

Had Isennang

Teknoloji hunen canggeh
Had isennang sengik



Beh ektiviti beceti

Kerjak gej siap



Hik pen hikenjip selese
Tok hijendak mase



Kateh sinui hik
Kipehanyok kerjak terek



Pit butang taleh
Tok payah hibegaleh
Dij kerjak deg jadik senang



Irama laguk: *Oh, Susanna*



Dij kerjak menjadik

Nus pen kenjip tenang

Dapat hibeharap

Teknoloji hunen penteng

Jeoi mase hiha kakdik



NOTA GURU

Belwal ha penenteng teknologi pai kateh sinui nunyenis.





Engrok Hubug



1. Bacak nepetek abik.
2. Ceryak ru tules engrok hubug ku jap-jap ayat.


Ayat	Engrok Hubug
a. Jeoi mai bigunak eng mende had isennang.	
b. Eng ngtulug pes deg ru care muden.	
c. Ilei had bigemar ya mai mende bekan taleh hoj kisuj tapik kipersot peninen.	
d. Baba had begunak amen jis manik mende abat tok payah hitil.	

3. Beh ayat gunakan engrok hubug ajeh.

Teknologi Canggih

Muh eng Atom. Eng nubanse vakum robotik. Eng ngyos ku kilang de bermuh Sawarki ku Selangor. Ku jaman hunen, jeoi mai bigunak eng mende had isennang. Eng ngtulug pes deg ru care muden. Bile butang ku berog eng bipit, eng an nget engkap jirok deg ngha selod habok ru ked.

Selaen ajeh, ku Sawarki jugak biperhol bebegei alat letrek de canggih. Alat adeh boleh kitulug kerip mase. Icuntuh, kawat eng de bermuh Baba. Ilei nubanse misen seknuj jename Plux. Ilei had bigemar ya mai mende bekan taleh hoj kisuj abat tapik kipersot peninen. Baba had begunak amen jis manik mende abat tok payah hitil.



Info

jirok = ceruk



Cerngai ru Belwal




EKTIVITI

1. Gerteg ernor guru abik.
2. Og respon secare belwal nu ernor ajeh.



Had Sernuk Nggunak Teknologi



NOTA GURU

Bimbeng mureb og respon de sesuei.



Bei Bebacak



EKTIVITI

1. Bacak surat rasmi abik.
2. Ceryak ru tules ayat tunggal ru ayat majmok.



Misen Neimbas Renis



Sekolah Kebangsaan Cenana Pekrik,
Kampung Cenana Pekrik,
31920 Kampar,
Perak Darul Ridzuan.



Tel.: 05-4121234
E-mel: skcp@edu.gov.my

Kening Menik/Penjagak,
Kampung Cenana Pekrik,
31920 Kampar,
Perak Darul Ridzuan.

4 NOVEMBER 20

Tuan,

PENASAL GENUNAK MISEN NEIMBAS RENIS HA KEKNOT TENIBAK MUREB

Hirujok pekare ku kemil, pehak sekolah kaha pergah ha genunak misen neimbas renis. Misen adeh bigunak ha keknot tenibak mureb nu sekolah.

2. Misen neimbas renis adeh an mulak bigunak ju 7 Januari 20 .
3. Misen neimbas renis kibepungsi kiimbas renis ru kiperhuj maklumat tenibak mureb ku Aplikasi Pangkalan Data Murid (APDM) ku kemil cencog. Tenujuk genunak misen adeh ialoh hiha pesernang neuros sekolah ru hipergek nyahneh kerjak guru.
4. Biharap mureb an naitibak gej mende biha imbas renis. Ju kenjeh, mureb naiminat tibak nu sekolah mende naibekengrog ha teknologi pai.

Sekian, abor haknuk.

De Kibercip Amanah,

(BAH ALANG A/L TAGOP)
Guru Besar



Bei Betules



1. Bacak papat digital LED.
2. Pileh nekate ru kek inekate belawan.
3. Beh ayat ju nekate belawan de bikep.

Bengsat ku Papat Digital Light Emitting Diode (LED)

Wak Sona ru Wak Carey baibacak memerip bengsat ku papat digital de mong ku kemil pintuk pusat sumber sekolah. Papat digital LED ajeh kiperneng memerip bengsat.

AGOK JERJAR RU RENYAH

BIGET CAKCAK, NGEKNGUT RU BEKBET

SUSUT KASOT RU BET KU WAS DE BISEDIAK

BIGET MUJ AMEN TIKTOK GURU BEIRIG

**BOR-TIBAK
NU
PUSAT
SUMBER**

NOTA GURU

1. Semanj mureb pileh empat nekate.
2. Bimbeng mureb kek inekate belawan.




Bei Becerite




1. Neng gambar abik.
2. Pelenkap gambar rajah.
3. Cerite kenenjip liengkek jjiroi maklumat de ya bipelenkap.

Belajar Care Muden



**Kenenjip Eng
Nggunak Komputer
Top**



NOTA GURU

Bimbeng mureb pelenkap gambar rajah ru semanj mureb becerite jjiroi maklumat de naitules.



Engrok Muh Has Sui ru Engrok Muh Has Tok Sui



1. Kernal engrok muh has sui ru engrok muh has tok sui.
2. Salit nej ayat ru gunakan tandak bacak de betol.



Saknike Aplikasi Tulug Ajar

1. cikgu lisa kipekenal aplikasi matematik nu mureb tahun 5 cemerlang ha pekukoh kenirak




2. bah senan ru bah akub baibelajar bahasa inggeris gunakan aplikasi bermuh kanak-kanak belajar bahasa inggeris



3. mureb tahut limak najawab senual ju aplikasi kuis sains tahun lima kateh bilik sains waja




4. apak wak embong kiajar ikenon jawab senual ku aplikasi nelateh peribahasa bahasa melayu ku jis selase



NOTA GURU

1. Peterang ceti aplikasi ru igenunak.
2. Semanj mureb nyate engrok muh has sui ru engrok muh has tok sui secare belwal.





UNIT
20

BELAJAR GUNAK TEKNOLOJI



Cerngai ru Belwal




EKTIVITI

1. Bacak maklumat.
2. Cerngai ma de kiterang ya guru ha aplikasi de mong ku gambar.
3. Ulas pekare ku kerileng liengkek de bekenayet ru aplikasi adeh.

Bahan Belajar de Sernuk

WERTV RASMI KEMENTERIAN PELAJARAN MALAYSIA
EDUWEBTV
WWW.EDUWEBTV.COM



Jeoi bahan de boleh higunak ha belajar jaman hunen. Care belajar hik boleh kijadik lebeh tecabar ru kitulug hiserakngik abor. Ju aplikasi adeh, kipetimul kenenjip ha panei lebeh ha nunanek pekare. Pitak sayet jugak an hahoh naiha berkep jenawab gej ru betol.

Info

hahoh = besaeng/belawat
belumbe-lumbe




Bei Babacak



1. Paham nepetek.
2. Ceryak ayat tunggal ru ayat majmok de mong kateh nepetek.
3. Bincang ha bernor genunak *Google Classroom* jijoi peniker lilei.

Google Classroom

Google Classroom ialah nanek aplikasi belajar de kipekenal ya Kementerian Pendidikan Malaysia. *Google Classroom* adeh bigantik genunak *Frog VLE*. *Google Classroom* buleh biekses ju bebegei platform. Icuntoh komputer mije, komputer top, tablet atao telipon pintar. *Google Classroom* mimang mesre menggunakan.



Google Classroom kihubug antare mureb ru guru belajar kemil cencog. Guru buleh kimagek bahan de bibelajar, kiog nu mureb beh nelateh atao kerjak sekolah. Mong bebegei aplikasi kilek de buleh bigunak kateh *Google Classroom*. Icuntoh, surat gecek, bob digital, e-mel ru kekilek nej.

Menu Mureb



Nanek neistimewe *Google Classroom* ialah mong nelibat kening menik kateh pembelajaran kekenon. Kening menik buleh naipanei pekare de kibelajar ya ikekenon seluneu numinggu. Lienai ru pitak guru buleh naisemak kerjak sekolah kekenon.

Iserengkol, belajar ru care adeh mimang had ibernor. *Google Classroom* jugak buleh kiperek nej nehubug antare sesayet, kening menik ru pitak guru.



Bei Betules



1. Bacak ru paham maklumat.
2. Bincang bernor ru niknej ha aplikasi *Kahoot* adeh.
3. Tules ayat kateh mentok perenggan secare mekanis kateh mentok tenules berangkei.



Belajar ru Kahoot

Ku jaman muden adeh, rugik amen tok higunak teknologi digital hipejadik bahan belajar. *Kahoot* ialah nanek aplikasi kemil cencog de buleh bigunak buje. Aplikasi adeh interaktif ru had ibernor ha beh atao ha jawab kuis. Begeiharok ha daptar ru gunak aplikasi adeh? Bei hidaptar samak-samak.

1
Cerleh aplikasi *Kahoot*.

2
Isik number pin de biog ya guru mate pelajaran.

3
Isik muh penangel betenujuk ha panei genei markah.

4
Hijawab kuis.

5
An biperneng merip betol ru sek ku ipenyudah.






Bei Besyaer



1. Pelenkap syaer ru tepat.
2. Bacak ru paham ceti syaer.
3. Beh pete peniker ha bernor ru niknej teknologi hunen.



UNIT 20

Teknologi ru Hik

Mase kicip kinyek beteman,
Kicip teros kijoi ijaman,



Adehloh bengsat jugak pedoman,

Hunen adeh jaman ya majuk,
Teknologi jadik tenumpuk,



Gunak teknologi jeoi mai setujuk,

Gunak teknologi hod hiserakngik,
Sek igenunak lihik de rugik,
Bekan nyik berog kelop hik de nyik,



Sengoi biog kelop ru nyawak,
Gunak semyak ya dikdij bangsak,
Cip ru menajuk hod hibejagak,





Sinui hik bernor hik tok hirugak

Dikdij sengoi jeoi tenuous

Kayat serakngik senusah dirik


Haros besediak agok himenman



Engrok Bantuk



1. Bacak maklumat.
2. Ceryak engrok bantuk.
3. Beh ayat gunakan engrok bantuk.



Bilek Komputer Jik



Wak Carey tengah kicerngai porem mureb secare kemil cencog ju Internet.

Wak Ipah buleh kitulug ajar Bah Anip beh kerjak sekolah.



Wak Sona tik kibeh kerjak sekolah.



Cikgu Amira ya kiseumak kerjak sekolah Bah Naim.



Mureb Tahun 5 Marikh an guj kelas Teknologi Maklumat dan Komunikasi pukul 12:10 dijjs.





Cerngai ru Belwal




1. Neng gambar abik.
2. Besual jawab ha maklumat de biog.

Tulug Ternyul

Encik, bolehka tulug eng ngha nyemrang nong timbok mende eng ngha et nu englag kenteh?



Bei, ngsemanj tulug ternyul ku belok ha pit butang mai cip jug ku lampu isarat adeh?



Wak Sona, harap hek hegunak jejantas mase ha nyemrang nong timbok.



Bah Naim, harap hek hejoi undang-undang mase hegunak nong timbok.







Bei Bebacak ru Betules



1. Bacak ru paham nepetek de biog.
2. Senarei ayat tunggal ru ayat majmuk kateh jadual jijoi nepetek.

Bil.	Ayat Tunggal	Ayat Majmuk
1.	Cuntoh: Ali kitebot meskar.	Cuntoh: Ali kitebot meskar ru iamek apak.
2.		

3. Tules ayat kateh mentok perenggan ha alat senelamat mase tebot meskar ru betol gunakan tenules berangkei.

Tip Senelamat Bemesar

Bemesar ialoh ektiviti de paleng bigemar ya sesayet. Mabek sayet naiperneng bebegei gaye mase naitebot meskar.

Amek apak de prihaten an kipileh was selamat ha kekenon lienai. Lienai naien kekenon naitebot meskar nyak ju was nong timbok. Maka, mong memerip aspek senelamat de hod hikot nyeh mase naibemesar dek kekenon tok nailukak terek.

Mong memerip tip de biamal mase hitebot meskar. Petame, pileh tupi senelamat de sesuei dek kekenon bilindong bernor. Kedue, perikse jenim meskar dek bor peksendok naitebot.

Ketige, terbor teninggik tempat genei meskar dek kekenon boleh naikayoh selese. Jug lienai pen boleh najjabat tik amen naiberentik.





Keempat, log leknog de senang bineng, tok kirak alaopen jis yah, seranyep atao kelem. Kekenon hodloh buleh biburuk ya mai de laluk jap-jap jis mase naibemeskar.

Kelimak, agok tebot meskar ku jis mengot mende terek naiha buruk mai de laluk. Keenam, hod hikawal ceknap meskar ru betol. Hik hod hibesat dek naicap iceknap meskar gunakan nar teg.

Iserengkol, hik hodloh hijoi langkah-langkah senelamat mase hitebot meskar ru hihok nyawak lilei.



Hik hodloh hilog tupi senelamat meskar dek tok hilukak amen hiyog.



Ped pelindong kurod hod hilog dek kilindong kurod.

Alat-alat
senelamat mase
hitebot meskar



Ped pelindong kanang hod hilog mase hibemeskar.



Hik kenak hilog kasot betutop de sesuei dek jug hik tok lukak.



Jaket pemantul cahayak hod hilog dek biburuk ya tenenbot kilek ju kennyak.



Bei Bedindag



1. Sebot ru paham lirik laguk.
2. Senarei nilai bor de mong ku laguk.
3. Perneng menyanyik secare didek hibor.



GermaT Tibak Selamat

Amen hinyemrang nong
 Agokloh hik lehe
 Hik neng kengwel kentop
 Hik neng nu kenog

Limak suwak nyemrang
 Hodloh hik hijjoi
 Amen tok bekerite
 Barukloh hik hinyemrang

Amen hik hicip jug
 Joiloh inelaluk
 Nenyemrang beriklet
 Mongloh ku depan hik

Amen tebot mutu
 Pakei tupi keleda
 Begloh cegeh-cegeh
 Pasti hik selamat

Nong timbok hik adeh
 Was de bebahaye
 Jijoi peneator
 Pasti hik selamat

Bejagak-jagakloh
 Amen ku nong timbok
 Jagak senelamat
 Tanggongjawab besamak.

Irama laguk:
Air Pasang Pagi





Engrok Bantuk ru Engrok Edjektip



1. Ceryak engrok bantuk ru engrok edjektip de mong kateh ayat.
2. Beh ayat gunakan engrok bantuk ru engrok edjektip de mong.

EKTIVITI

Petue Senelamat Nong Timbok



Rancang ceknip abetol.

Senalo hijoi had lajuk de ya bipetetap. Agok en tenenbot lajuk bejaye ha ilak belagak.



Patoh gares peneator senelamat mase hiputong tenenbot kilek. Agok putong tenenbot had ireknek.

Berentik amen lampu isarat kale ceher. Agok pan galaj doh hisusah.



BERI LALUAN



Neng cermin cener abik ru og isarat peksendok hitukar lurong.

Agok joi tenenbot kilek rek bejaye.



Agok celah nunoh antare tenenbot kilek.

Agok birel bebakat ku nong timbok. Og neutame ha mai cip jug ru mai tebot meskar.



Hod hiamal sikap paleng sabar mase hien tenenbot.

Joi lurong lilei. Agok putong genares had idengras.






18 Suku Kaom Sengoi

Orang Asli atao hik sengoi ialoh nanek bangsak de naigei ku Semenanjung Malaysia. Hik sengoi bicerlah nu 18 suku kaom. Ju 18 suku kaom ajeh, hik sengoi bicatuk kateh nik gu de utame, iaajeh gu Negrito de naigei ku apah utare Semenanjung, gu Senoi de naigei ku semakdek Semenanjung ru gu Melayu-Proto de naigei ku selatan Semenanjung.

Suku kaom de mong kateh gu Negrito ialoh Kensiu (Kedah), Kintak (Perak), Lanoh (Perak), Jahai (Perak ru Kelantan), Mendriq (Kelantan) ru Bateq (Pahang, Kelantan ru Terengganu). Suku kaom de mong kateh gu Senoi ialoh Temiar (Perak ru Kelantan), Semai (Perak ru Pahang), Semoq Beri (Pahang ru Terengganu), Jahut (Pahang), Mah Meri (Selangor ru Negeri Sembilan), ru Che Wong (Pahang). Suku kaom de mong kateh gu Melayu Proto ialoh Orang Kuala (Johor), Orang Kanaq (Johor), Orang Seletar (Johor), Jakun (Pahang ru Johor), Semelai (Negeri Sembilan ru Pahang) ru Temuan (Negeri Sembilan, Pahang, Selangor ru Melaka).

Hik sengoi had iunik mende hik hitarek engrok jjiioi suku kaom memasig. Alaopen hik bebize suku kaom tapik genensag sewang, pantag ru adat hamerek samak. Jeoi maklumat boleh hiberkep ju bebegei sumber begei Muzium Orang Asli, Jabatan Kemajuan Orang Asli, Internet, bob ru kekilek nej. Beiloh samak-samak hikenal bangsak lihik ru hiperes kelog sengoi kateh sengik memasig.





Info

hitarek = hibelwal

Sumber: Jabatan Kemajuan Orang Asli (Jakoa), Kementerian Pembangunan Luar Bandar.



Juret Lemu Penanei



UNIT 18

Kermuh nanek alat de
buleh kipergek leus
kateh caknak.

UNIT 19

Begeiharok hiha
berkep nunanek
maklumat ru deras?

UNIT 17

Bok de berisiko tinggi
ha kenak influenza?

UNIT 20

Kermuh nar aplikasi de
sernuk higunak ha belajar.

UNIT 16

Ma iceti pulehperei?

UNIT 21

Yama hod hiamal tip
senelamat bemeskar?



Care mennan:

1. Nanek gu mong empat urag mureb.
2. Undi bok de canuk an kiman.
3. Mureb naipej takan ku kateh petak jijoi nehator unit.
4. Mureb an kijuret ku petak ru kijawab sensual.
5. Bile lei ku petak Duniak Lemu Penanei, mureb an kipej takan ceklod.
6. Mureb menman joi geniler.
7. Mureb de tok buleh kijawab ru takan sek kipej ku kateh petak de betol an kilos nej ju imulak.
8. Mureb de lei canuk ku Unit 21 an kimenang.



NOTA GURU

1. Beh gares mennan juret ru kapor tules atao gunakan pita cerentat.
2. Cetak sensual ju Kod QR ru certat kateh jap-jap petak.



RM27.00
ISBN 978-983-49-2843-8

9 789834 928438
BT235001